

## Kungoja na Kukesha,

*Basi msiutupe ujasiri wenu, kwa maana una thawabu kuu. Waebrania 10:35.*

**Y**esu anakuja upesi, nafasi yetu inapaswa kuwa ya kungoja na kukesha kwa ajili ya kuja kwake. Hatupaswi kuruhusu kitu chochote kusimama katikati yetu na Yesu. Tunapaswa kujifunza hapa kuimba wimbo wa mbinguni, ili kwamba wakati pambano letu litakapokuwa limekwisha tuweze kujiunga katika wimbo wa malaika wa mbinguni katika mji wa Mungu. Ni wimbo gani huo? Ni wimbo wa sifa, heshima na utukufu kwa Yeye aliyeketi katika kiti cha enzi na kwa Mwana-kondoo milele na milele. Tutakutana na upinzani; tutachukiwa na watu wote kwa ajili ya Kristo, pamoja na Shetani kwa sababu anafahamu kuwa wafuasi wa Kristo wana nguvu ya Mungu, ambayo itadhoofisha mvuto wake. Hatuwezi kuepuka fedheha...

Hatupaswi kuruhusu muda wetu kutawaliwa sana na mambo yanayopita, au hata kwa mambo yanayofungamana na makusudi ya Mungu, yatakayotufanya kupitisha siku baada ya siku bila kujiweka karibu na upande wa Yesu uvujao damu. Tunataka kuzungumza Naye kila siku. Tunaaswa kuvipiga vita vizuri vya imani. Itakuwa vita ngumu sana kudumisha maisha ya imani thabiti; lakini ikiwa tutajitupa kikamilifu kwa Kristo, tukiwa na uamuzi thabiti wa kumng'ang'ania Yeye pekee, tutaweza kumshinda mwovu na kupata ushindi adhimu. Mtume Paulo anatusihi, "Basi msiutupe ujasiri wenu, kwa maana una thawabu kuu." Tena anasema, "Lakini mwenye haki ataishi kwa imani"...

Tunapojihisi shauku kidogo ya kuzungumza na Yesu, hebu tuombe sana. Kwa kufanya hivyo tutavunja mtego wa Shetani, wingu la giza litatoweka na tutatambua uwepo mzuri wa Yesu (Historical Sketches, 145, 146).

Wakristo wanaweza kuwa na furaha ya ushirika pamoja na Kristo; wanaweza kuwa na ,nuru ya upendo Wake na faraja ya kudumu ya uwepo Wake. Kila hatua katika maisha inaweza kutuleta karibu na Yesu, inaweza kutupa uzoefu wa kina wa upendo Wake, na kutuleta hatua moja karibu na makao ya amani yaliyobarikiwa. Hebu na tusiutupe ujasiri wetu, bali tuwe na imani thabiti, thabiti zaidi ya ilivyokuwa kwanza. "Hata sasa Bwana ametusaidia," na atatusaidia hata mwisho. Hebu na tutazame kwenye nguzo kuu, zinazotukumbusha yale Bwana aliyoyatenda kutufariji na kutuokoa kutoka mkononi mwa mharibifu. Hebu na tuhifadhi vyema katika kumbukumbu zetu rehema zote ambazo Mungu ametuonesha – machozi aliyoyafuta, maumivu aliyotuliza, wasiwasi aliouondoa, uoga alioutawanya, mahitaji aliyotupatia na baraka alizotoa – hayo yatuimarisha kwa mambo yote yaliyo mbele yetu (Steps to Christ, 125).

Kwa hakika kama ambavyo haujawahi kuwepo wakati ambao Mungu hakuwepo, vivyo hivyo kwa hakika haujawahi kuwepo wakati ambao haikuumpendeza nia ya Mungu ya umilele kudhihirisha neema Yake kwa wanadamu (The S.D.A. Bible Commentary, Ellen G. White Comments, vol. 7, 934)